

TEZAUUR LITURGIC

1 IANUARIE

SLUJBA

SF.IERARHI


**VASILE CEL MARE,
GRIGORIE AL NYSSEI,
PETRU AL SEBASTEI;**

SF.CUVIOȘI

**VASILE, EMILIA,
MACRINA CEA BĂTRÂNĂ,
NAUCRATIE ȘI
MACRINA CEA TÂNĂRĂ
DE LA
CEZAREEA CAPADOCIEI**



MOSCOVA, 2000



СЛУЖБА

**святой и благочестивой семье святителя
Василия Великого:**

**пресвитеру Василию Старшему,
преподобной Емили, святителю Григорию
Нисскому, святителю Петру Севастийскому,
преподобному Навкратию, преподобной
Макрине, блаженной Феосевии (Феозве)
диаконисе, исповеднице Макрине Старшей**

НА ВЕЧЕРНИ

На Господи, воззвах: стихиры, глас 1:

Супруг всечестных Василия и Емилию воспоим
любвию, / и чада их восхвалим всекрасныя и
святые: / Великого и славнаго Василия, /
Григория и Петра, святителей премудрых, /
Макрину и Феозву, добродетельми украшенных,
/ Навкратия Богоблаженнаго, / с ними ублажим
Макрину исповедницу Христову, / чудотворца
Григория чадо духовное, / и к ним,
припадающе, возопиим сердечне: / не оставите
нас заступничеством вашим, святии, / да
вашими молитвами дарует нам Господь //
просвещение и велию милость.

Свыше бо Небеса ныне радуются и земля
веселится, / верных людей же сердца играют, /
прославляюще собор семьи благочестивыя, /
спасения пути являющие в разных образех. /

Сего ради к ним любовью возопиим: /
испросите молитвами вашими, Богоблаженнии,
/ душам нашим спасение и телам здравие
даровати // и велию милость.

Вострубим трубою песней / и гласом радостного
веселия святую чету воспоим: / Василия,
пресвитера благочестиваго, / и Емилию
достоблаженную, лозу честную, / сии бо
породиша рождие винограда спасеннаго, /
Василия, Григория и Петра священных, /
Макрину и Феозву Богомудрыя, / Навкратия
преподобнаго, Ангелов радование; / от нихже
источается нам веселие душевное, / ихже
молитвами, Христе Боже, // спаси души наша,
яко Милосерд.

Слава, и ныне, праздника, глас 8:

Господи, исполнити хотя, / яже уставил еси от
века, / от всякаго творения служители тайны
Твоея приял еси: / от Ангелов — Гавриила, от
людей — Деву, / от Небес — звезду и от вод —
Иордан, / в нем же беззаконие мирское
потребил еси. // Спасе наш, слава Тебе.

На стиховне стихиры воскресны.

Слава, святым, глас 4:

Домашнюю церковь восхвалим, вернии, /
Христа Спасителя воспевающе, / Василия и
Емилию достоблаженных, / со чадами их

священными: / сии бо во своем чину Богу
угодиша, / Церковь добродетельми украсили
есте, / и Спасу молятся очищение и оставление
грехов даровати // верою совершающим память
их.

И ныне, праздника, глас тойже:

Тебе, в Дусе Святом и огни очищающего грех
мира, / зря Креститель грядуща к себе, /
ужасаяся и трепеща, вопияше, глаголя: / не
смею держати верх Твой пречистый, / Ты мя
освяти, Владыко, // Божественным явлением
Твоим, Едине Человеколюбче.

Тропарь, глас 4:

Служителей Христовых, / пресвитера Василия и
Емилию воспеваем супруг честных, / с ними же
Великаго Василия, Григория с Петром и
Навкратием Божественным, / Макрину
Богоносную и Феозву чудную, // яко
Божественный род Христу угодивших.

НА УТРЕНИ

Канон святым, глас 2.

Песнь 1.

Ирмос: Грядите, людие:

Древа жизни наслаждающиеся и райское
воистинну веселие восприимше, всемудрии, /

вас восхваляющая молитв Человеколюбца
спасти от всяких зол.

В пути заповедей Твоих шествуя тепле, Владыко
Христе, / Твои раби обители достигоша, /
сугубым желанием жизни вечныя наслаждаяся.

Богородичен: Светлыми лучами Твоего Сына,
Богородице, / просвети омраченную мою душу,
/ страстей смущение отжени, Твоими, Чистая,
ходатайствы.

Песнь 3.

Ирмос: На камени мя веры:

Воспоем супруг всечестных, Василия и Емилию,
/ от нихже возсияша Церкви чада благодатная:
/ Великий и славный Василий, / Григорий, Петр
и Навкратий всечуднии, / Макрина и Феозва
блаженныя, / добродетелям нас научающии.

Законами питаюся Владыки и в добродетелех
возрастая, / поучала еси твоя дети заповедем
Господним, Емилие всечудная, зовущи: / несть
свят, якоже Бог наш, // и несть праведен паче
Тебе, Господи.

Богородичен: Яко Бога заченши, Содетеля же, и
Зиждителя, и Господа, / роди Тя вси
человечестии, Чистая, ублажают, / и
Безтелесных разумная чиноначалия яко Матерь
Божую Тя славят.

Седален, глас 1:

Праведных возсия Божественная память / и
земныя озари вся концы светло: / Емилия
радуется ныне о чадах своих / и Василий с
веселием зовет: // Ты еси верных Твоих, Христе,
похвала и радование.

Слава, и ныне, праздника, глас тойже:

Иисусу рождшуся от Девы Марии и во Иордане
крещшуся от Иоанна, / Дух сниде на Него,
зримый в виде голубине. / Сего ради пророк со
Ангелы глаголаше, зовый: / слава пришествию
Твоему, Христе, / слава Царствию Твоему, //
слава смотрению Твоему, Едине Человеколюбче.

Песнь 4.

Ирмос: Пришел еси от Девы:

Великия милости сподобистесь от Бога
добронравным житием вашим, блаженнии, /
темже и нам испросите богоприятными вашими
молитвами / оставление грехов, милости Божия
и Царства Небеснаго.

Радости исполняются днесь верных собори, /
имуще вас, Василие и Емилие всеблаженнии, /
теплыя молитвенники и христианом усердныя
заступники.

Богородичен: Невесту Тя безневестну и чисто,
Чистая, селение Иисусово, / святейшую Херувим
вемы, Богородице.

Песнь 5.

Ирмос: Света подателю:

Днесь память ваша, блаженный, созывает люди
на духовную трапезу. / Темже сподобите и нас
достойно сию вкусити, / и пищи райския во
обителях Отца Небеснаго вкупе с вами
наслаждаться.

Непостижимый свет почив в тебе, преподобне, /
пресветлу свещу миру ты показа Христос, /
темже память твою поем, великий иерарше
Василие.

Облистав от востока, яко звезда многосветлая,
Церковь просвещаеши, отче Григорие, /
проповедавая всеблагочестномудрыми словесы
Христа, правды Солнца, Тому взывая: / разве бо
Тебе, иного бога не знаем.

Богородичен: Дреманием уныния мя сон
греховный постиже, Марие Богородице, /
бодренною молитвою Твоею возстави мя к
покаянию.

Песнь 6.

Ирмос: В бездне:

Проходя добродетелей предел, отче Петре, / и
восхождения в сердца твоем полагая, / от земли
взялся еси ты непрестанным течением к
Небесному жительству / прежде от плоти
изшествия твоего.

Царства Божия возжелел еси и, над страстьми царствовав, / в пустыню вселился еси, Навкратие милостиве и чудне, / по благоволению лучшему радость праведных получил еси.

Макрино Богомудрая, девства похвало, / тепле соблюла еси невредно воздержанием твое житие, / плоть духу покоривши, преподобная.

Венцем дарований Христос венча тя, / яко диаконису всечестную и трудолюбную / и лику девственному наставницу, / и в чертозах Небесных, Феозво Богоблаженная, всели тя.

Богородичен: Милости Твоя, Богородице, сподоби мя, премилостиваго Спаса рождшая, / Своею Кровию от смерти вечныя человеки избавльшаго.

Кондак, глас 4:

Явился еси днесь вселенней, / и свет Твой, Господи, знаменая на нас, / в разуме поющих Тя: / пришел еси и явился еси, // Свет Неприступный.

Икос:

Галилеи язычестей, Завулонстей стране и Неффалимстей земли, / якоже рече пророк, Свет велий возсия, Христос. / Омраченным светла явился Заря, из Вифлеема облистающая, /

паче же из Марии Господь, всей вселенной
возсиявает лучи Солнце правды. / Темже, иже
от Адама назии, приидите вси, облечемся в
Него, да согреемся, / покрывает бо нагия и
просвещает темныя. / Пришел еси и явился еси,
// Свет Неприступный.

Песнь 7.

Ирмос: Богопротивное веление:

Макрино старейшая и благочестивая, /
исповедница и страданица за имя Христово
всеславная, / с мужем твоим, твердым
мучеником / и с отцем твоим духовным и
чудотворцем Григорием, моли о всех нас.
Христовою окормляеми дланию благочестно, /
ко пристанищу тихому Вышня светлости
устремилися есте, Богоблажении, вопиюще: /
воплотивыйся нас ради человеков, Иисус
Господь, / Сый благословен и препрославлен.

Богородичен: Гавриилово благовестие
услышавши, Марие Чистая, / прияла еси
благоволение Отчее и Духа нашествие, / и
родила еси Христа — Слово воплощенное,
радуясь и вопиючи: / Иисусе, Сыне
Прелюбезный, Сый благословен и
препрославлен.

Песнь 8.

Ирмос: Пещь иногда:

Воспоим, вернии, всечестную двоицу, Василия и
Емилию Богоблаженных, / от них бо возсия нам
украшения Церкви Православныя и верных
утверждение, / с нимиже едиными усты
воспоем Владыце: / благословите, вся дела
Господня, Господа.

Не токмо Капподокия хвалится, / но и вся
Церковь земная и Небесная ликовствует, /
украсившеся дивными именами вашими,
святии, / и подвигает восклицати Троице
Нераздельней радостно: / благословите, вся дела
Господня, Господа.

Богородичен: Слово Отца Небеснаго
Единосушное, / Адамово избавление от кровей
Твоих девственных воплотися, Дево Марие
Чистая, / Емуже благодарственне зовем: /
благословите, вся дела Господня, Господа.

Песнь 9.

Ирмос: Безначальна Родителя Сын:

Како ублажим вас, всечестнии! / Како
прославим благое единокровие ваше! / Аще и
земнии бысте, но Небесных достигосте,
Богоблаженнии, / идеже Святей Троице
предстоите и молитесь спастися любовью вас
почитающим.

Целомудренно поживше и благочестно, святии, /
ныне сладости несказанныя сподобистесь, /
совершающим усердно прехвальную и славную
память вашу, / спастися молитесь.

Богородичен: Глас Тебе ангелов, Пречистая,
вопием: / радуйся, спасение всех человеков / и
славных мучеников Божественное венчание.

Светилен:

Предстояще ныне Трисиянному Великому Свету
/ и пребывающе в неизреченной светлости со
всеми святыми, / помяните всех нас, святии, /
память вашу светоносно совершающих.

На хвалитех стихиры воскресны.

Слава, святым, глас 1:

Василий всемудрый, священства правило, / с
честною Емилиею песньми достойно да
почтится, / с нимиже облистает чад их собор
святый. / Ихже светлое торжество совершающе
любовию, // поем песньми Божественными.

И ныне, праздника, глас 2:

Днесь Христос на Иордан прииде креститься, /
днесь Иоанн касается верху Владычню: / Силы
Небесныя ужасошася, / преславное видяще
таинство, / море виде и побеже, / Иордан,
видев, возвратися. / Мы же, просвещшеся,

вопием: // слава явившемуся Богу, и на земли
виденному, и просветившему мир.

